

## O R A T I O

Q U Æ

QUID SIT MEDICINA  
DOCENTUR PHILIATRI.Habita die Dominico vigesimo-nono mensis No-  
vembris, anno Domini M. DCC. XLIV.

IN SCHOLIS MEDICIS,

*A M. FRANCISCO MERY, Doctore Medico  
Parisiensi & Scholarum Professore, Medicinæ  
Stadium auspicaturo.*

P A R I S I I S,

Apud QUILLAU, Bibliopolam & Typographum Universitatis &  
Facultatis Medicinæ Juratum, viâ vulgò dictâ *Galande*, prope  
Vicium Stramineum, sub Signo Annunciationis.

M. DCC. XLIV.

REPORT  
OF THE  
COMMISSIONER OF THE  
LAND OFFICE  
FOR THE YEAR 1880

ALBANY:  
J. B. LEECH,  
PRINTER.  
1881.

THE  
LAND OFFICE  
ALBANY



O R A T I O  
Q U A  
QUID SIT MEDICINA  
DOCENTUR PHILIATRI.



I eorum omnium qui Artem aliquam  
profitentur & edocent vestigiis insistere  
placeret, VIGILANTISSIME DECANE,  
VIRI MEDICINÆ PROCERES, PHILIATRI  
CARISSIMI, AUDITORES OMNIUM ORDINUM  
SPECTATISSIMI, Encomium Medicinæ, Medico-  
rumque laudes hæcce tota celebraret Oratio. Qui-  
busdam forsitàn felicior Oratoribus, fabulas fabulis  
non intexerem, & mihi vera dicenti, dicendorum

A

superesset amplissima seges. Non aliam Artem de antiquitate & præstantiâ cum Medicinâ certare posse testarentur sacri Codices, Annales Populorum evincerent, confirmaret experientia.

Quis enim, AUDITORES, in Sacris adeò peregrinus, ut hominem sceleris purum, fortunatam hanc annorum seriẽm, quam nec fœdabat hyems gelida, nec torrida torquebat æstas, ignoret numerasse? Brevi heu! nimium illâ ætate, labore duores parta non erat, sed prodigus ager, munificentissimi Creatoris bonitate, suavem sine arte parabat mensam: aëre puro dies lucebant sereni: innocuas leges sola dabat aurea simplicitas: mens erat quieta, sanum corpus, sinceræ vires: non fidere maligno dira sæviebat morborum cohors, nec supremum diem, sceleris vectigal, nescius mali reformidabat Homo. At ex quo, omne ausus crimen, æqualem se Supremæ Majestati futurum credere non horruit, & ultione irati Numinis persequente fontem, fatale illud, MORIERIS, juravit Omnipotens, Terra, Pontus, Aër, quidquid in humanæ gentis commodum salutemque dederat summus Opifex, furoris Divini nunc Minister, maledictique obsignatum caractere, hominem undiquè ineluctabili vulnerat telo. Tellus.

pestiferum depromit gramen, inficitur aër, debacchantur febres, instat mors, & de homine vix formato actum erat, nisi coævam mundo Medicinam creasset Altissimus, quæ homini profundioribus jam obcæcato tenebris, titubanti, incerto, insidiasque expavescenti undequaque, tutum monstraret iter, arceret lethifera, salubria ministraret, sedaret dolorem, morborum debellaret furores, fugientemque sapius animam revocaret.

Quis annales populorum volvendo non agnoscat, nondum excultas Artes, non excogitatas, cum jam-jam sub titulo Sapientum, viri quidam in cognitione herbarum versati designabantur, & pro exaratis de Arte Medicæ tabulis, Regi suo Hermeti, Trismegistæ nomen detulerant Ægyptii? Quis fuit Græcorum in Medicinam cultus, quæ reverentia? Quos mortis tardare gradum, febresque pestiferas è medio populorum depellere peritos viderant, hos homines fuisse non rati, inter Deos recensabant, templis, altaribus, victimisque honorandos. Nonnè dum jus civitatis Regibus denegat Roma, statuas Medicis erigit, cingitque tempora coronis? Quæ Regio tam barbara, ut in Medicinâ cœleste donum non mirata sit, hoc cæteris præstantius, quo carior est eritque semper vita?

Quidquid de Medicinæ præstantiâ magnificè cœn-  
fuerit Antiquitas, AUDITORES, majora tamen me-  
moris animi monimenta, à vobis omnibus & sin-  
gulis reposcit & exspectat Ars à Gallis nunquam sat  
prædicanda. Hosce elapsos nuper recordamini tristi-  
tiæ & horroris dies, quibus Gallia, veluti mater or-  
bata liberis, Terram implebat gemitibus & lacrimis,  
votis & precibus diù noctûque fatigabat Cælum: qui-  
bus Civis quilibet optimus ( & quis non erat ! ) defi-  
xis in terram oculis, errabundus & cursitans, quem  
quærebat nuntium advenisse fremens, solem sibi ul-  
timùm occidisse reformidabat. Quibus tandèm, hor-  
resco referens, carissimus Rex noster LUDOVICUS,  
Victor Belgiorum, cui triumphos parabat Rhenus,  
sui in populum amoris victima, truculentâque ictûs  
febre, jacebat immotus, exanimisque jam credebatur.  
Quis Galliæ reddidit Patrem, Protectorem Relligio-  
ni, Pietati Christianissimum Imperatorem, Heroem  
Gloriæ, felicitati publicæ Tutorem, Belli Pacisque  
Arbitrum Europæ, Orbi universo hunc Regem, qui  
sivè sumenda sivè remittenda judicet arma, sapien-  
tiam semper advocat in concilium, hâcque ministrâ,  
Lauream nunc, nunc Oleam, utrique natus sic eli-  
git, ut mundi Rectorem clementissimum imitatus,

amarū malit posito fulmine, quàm fulmen jaculando  
formidari? Sileant Artes quælibet: munificentissimum  
hīc divinitus afflatæ recognoscatis Medicinæ Donum,  
quæ eò excellentior vobis celebranda, quò Pretio-  
sior singulis vita LUDOVICI.

Sed præstantiam Medicinæ laudent, quibus magna  
datum est dicendo proximè assequi; mihi satis est  
superque versari in quæstione simplicissimâ quæ Phi-  
liatris, quorum institutio in Medicinâ à Saluberrimâ  
Facultate hodiè mihi concredita est, prodesse valeat.  
Quæro ergò quid sit Medicina? Quod quidè ut li-  
quidiùs pateat & certiùs, duo partitâ bifariâ ora-  
tione tractanda suscipio: Quid scire debeant Philia-  
tri, ut Medicos se profiteri possint, hoc primum:  
Quæ mixta Medici laboribus fastidia, hoc secundum:  
faveant linguis.

## P R I M A P A R S.

**Q**UÆ utilitati publicæ ita consulunt artes, ut  
ad gloriam, & nominis immortale decus, tu-  
tum suis referent iter, innatâ quâdam propensione  
homines invitant & alliciunt. Nemini ergò mirum  
videatur, AUDITORES, Juvenes quam plurimos,  
Medicinæ captos illecebris, huic sese arti vovere



sæpiùs, quæ supremum in vitam hominum partitur imperium & dividit, sancitique à Deo cum mortalibus commercii, jure ministra dicitur & modatrix. Ausus est sanè laudabilis, Nobile conamen. Sed quid ab ipsis postulet Medicina, quid sui ferre valeant humeri, quid recusent, hodiè mecum perpendant Philiiatri. Intelligant hodiè (dum sese arti Medicæ consecrare volunt, & tempus adest *Pelago committere ratem*) se errare graviter, petituosque brevi littora naufragos, si futilibus invidorum incautè fidentes verbis, vel quorumdam, non dico, Medicorum, sed Medici Simiorum exemplo delusi, hunc in Medicinâ omne tulisse punctum arbitrentur, qui suum scholæ Medicæ inscripsit nomen, per biennium vel circiter, lectionibus Professorum astitit nonnunquam, quoslibet indiscriminatim de Medicinâ expeditiori & compendiosâ tractantes evolvit libros, formulas Memoriam mandavit, Medicum, quod vocant, emensus est stadium, & tunc, quasi infusa sibi fuisset, consenescentium in studio Medicinæ omnis doctrina, Medicum se profiteri non dubitat. Ab Hippocrate Medicorumque sapientissimis discant artem esse longam, vitam brevem; edoctis plurima, ediscenda multo plura superesse; nullam esse Medicinæ



cinæ partem, quæ totum sibi non reposcat hominem; condito ab Omnipotente, in salutem vitamque hominis, orbe terrarum immenso, nihil aliud esse Medicinam quam totius Naturæ studium, huncque solum Medici titulo insigniri debere, qui in omni cognitionum, ad conservandam hominis sanitatem vel reparandam, creatarum genere, versatus agnoscitur & peritus. Concisa & simplex harumce cognitionum suo delineatorum ordine expositio, quid scire debeant Philiiatri ut Medicos se profiteri possint, attendenti demonstrabit.

Maturum admittunt hominem, postulantque sapius artes innumeræ: Puerum ipsummet sibi vindicat Medicina prudentior. Prima tenellæ huiusce ætatis institutio adimplendis quondam Medici partibus infantem præparet, sublimioribusque studiis disponant humaniores litteræ. Frustrâ se fieri posse Medicum confidet vir factus, si micante vix juventâ, ab arte suadendi animos flectere non doctus, eloquentiæ nobilis vim ignoret & potentiam, quæ in Medico ægrorum solatio & saluti intenta semper, dum loquacitatem ignorantia comitem assiduam fugat, multa paucis totidem veluti oracula pandit, spem addit miseris, erigit fractos, indociles debellat, utque ve-

ritatis argumentum est non fallax, sic non quæsitam abjectè in Medicum fiduciam cogit, quam fovet peritia. Juvenis à Dialecticâ veri & falsi, teste Tullio, disceptatrice & arbitrâ instructus, hanc solam differendi seligat methodum, quæ simplicioribus, sed veritatis inconcussæ innixa principiis, concludendorum nunquàm vereatur falsitatem, intortasque sophismatum captiones, sæpius in Medicinâ ægrotantibus fatales, funditùs subvertere valeat. Juveni Universitatis rerum adumbret imaginem Physica, diversos evolvat motus, stupendorum Cœli & Terræ Phenomenum recludat causas, Naturamque ità constanter in omnibus & ubique operantem demonstret, ut quâ immutabilitate, quibus legibus orbis regitur immensus, iisdem generari corpus humanum, nutrirî, crescere, labefactari, & perire agnoscat in Medicis versatus. Sic tandem in linguarum cognitione erudiatur juvenis, ut Societate vocum sermonisque commercio, cum Græcis, Latinis, ceterisque cujuslibet regionis & ævi conjunctus populis, scientiam è saluberrimis ipsismet fontibus possit haurire, insciitiæ interpretum, in gravissimis exitiali, credere non cogatur, quasque à remotioribus sæculis sustinet terrarum orbis Medicas opes, civibus quondam fideliter dispense.

Ea sunt cognitionum genera , AUDITORES , quæ plures laboris assidui postulant annos , & ad artem Medicam ita disponunt & præparant , ut iis orbatos juvenes , à Medecinæ penetralibus esse æternum arcendos , pronuntiaverit æquus quisque rerum æstimator. Vobis , PHILIATRI CARISSIMI , qui potentes eloquio , purioris Dialecticæ principiis imbuti , versati in Physicis , linguarum divites opibus , huc sanè acceditis omnes & singuli , peragrandum nunc aperiā Medicinæ campum.

Sola est Medici laborum meta , hominum tuta salus. Qui ergò hominem curabit aliquando Philiatæ , hominem noscat primùm , & à corpore ad animum ascendat. Erit illud profectò tempus , quo libri diurnâ nocturnâque manu versandi venient ; procul hodiè à Philiatro scientiæ corporis humani totum se tradere volenti , librorum suppellex , elegantesvè , sed infidæ non rarò , tabularum imagines depictæ. Sit ipsi tumulus schola , Magistra mors , cadavera libri. Quâ arte proderit vivis , à mortuis discat. Repudiat Medicina quos delicatiores utili sanguine manus tingere pudet , terret putredo salutaris , foetidusque exanimat odor. Avidâ manu cultrum arripiens Anatomicum , humana ipse interroget viscera. Quàm cer-

tiùs his ducibus & Magistris , naturalem corporis edoctus statum , innatas & constantes partium sedes & situs, fibrillæ compagem minutissimæ , naturam fluidi & indolem , solidi structuram , figuras disparēs , directionem , communicationes & usus ; hanc distinctam corporis assequetur notionem , quæ apud ægros , in gravioribus morbis , fomitem mali , laceratam partem , proximamque symptomatum causam detegat & revelabit.

Sed inops est , sterilis , & manca , obviâ duntaxat sensibus , corporis notitia. A diuturnâ & solerti cadaverum inspectione , sublimiora sapiat non minus animi , quam corporis scrutator Philater : Intelligat corpus , à se ipso cuilibet impar & inhabile motui , ad nutum animi moderantis moveri vivum ; Animum , immortalem hanc divinitatis essentiæ particulam , mirabili vinculo reciproci cogitationis & motus commercii , volente supremo Numine , unum cum corpore sic conjungi , ut moto corpore , cogitet animus , animo cogitante , moveatur corpus. Hæc animi cogitationes , quas motus internos , affectus vocare placuit , meditetur attentius. Quid possint in corpus ab increatæ sapientiæ legibus aberrantes , attendat sedulò. Quam labem inurant cor-

pori, effrænis amor & exlex, furens ira, invidia depascens, gelidus timor, tristitia languens, anhelans spes & irrequieta, testem sæculorum appellet experientiam, Medicinæ scitetur oracula : Quæ morborum Ilias, hoc laboriosius expugnanda, quod profundioribus obvoluta tenebris lateat sæpius pestis fons & origo, hominesque ægrotare corpus fateantur ingenuè, se sanos animo reputent omnes?

Obscurioribus penetratis semel animi recessibus & latebris, ad corpus, facem præferente Physicâ, sistematibusque probatis ratione, experienciâ confirmatis suffultus revertatur Philiator. In toto corpore, singulisque partibus, prima hæc rerum omnium rudimenta rimetur & quærat, quorum quies vel motus, discrepans figura, confusioque plùs minùs æqualis, fluida & solida, odores & sapes, uno dicam verbo, quidquid in corpore subjicitur sensibus, producunt & formant, tot variè multiplicata temperamentorum discrimina constituunt, quot homines excogitaverit, & everso primariæ proportionis ordine, sub diversâ mille morborum fronte corpus deterunt, mortemque accelerant ineluctabilem. Aspiciens tubulos, liquores explorans, suppeditaris in primâ juventute, à Geometriâ, Hydraulicâ, Mechanicâque

cognitionibus utatur tempestivè. Sit ipsi Aër qui cuncta subit & penetrat, cujusque vires novit & potentiam, vaforum elateris effector, progressivi liquorum motus principium, reciprocae utriusque actionis conservator. Sic tot in unum conspirantibus auxiliis, maximæ Philiatro solventur difficultates, functiones enodabuntur, innotescunt actiones, & totius œconomiae animalis elucescet Mechanismus.

Quantumvis in primâ hâc inquisitione desudaverit Philiatro, AUDITORES, quo indefesso non est studio & labore, privati cujuslibet morbi comparanda cognitio, causarum multiplicitas recognoscenda, detegenda signorum subdola diversitas, prædicendorumque veritas astruenda? Hic alimentorum doctes & electionem exploratas habeat impiger, illie servandum in exercitationibus, vigiliâ, quiete & somno, ediscat modum, ubique ab ipsismet sanitatis & vitae fontibus arma ministrari sentiat, quibus potentiùs quassatum subvertitur corpus. Quæ vita immensæ remediorum varietati penitiùs introspectiendæ fingetur longior? Nonnè quod per Aëra volitat, peragrat campos, natat in aquis, vegetat humo, in imis delitescit & fovetur terræ visceribus, omnia in salutem hominis creavit Omnipotens? Indefinenter



ergo naturam interroget divinitatis Minister, iter sequatur monstrantem: Ipsi mixtorum texturam recludat disceptatrix analysis. Agendi remediorum normam erudita suadeat ratio, usumque testetur recon- dita in libris temporum experientia. Jamjam aperiat libros; tempus adest aderitque semper, quo Philiatro nunquam erudiendo satis, scientia morborum, remediorumque virtus è fontibus ipsismet haurienda.

Sed quemadmodum Apes avidæ mellis per amœna volitant ruris odoriferi vireta, candida circum lilia funduntur, fragrantem carpunt Thimum, pinguem pascuntur Tiliam, exsuccas averfantur herbas, steriles deferunt agros, fucosque pecus ignavum arcent à præsepibus; sic prudentior Philiater, in tantâ librorum segete, non omni fidat scripto, cautus sit in delectu. Ab innumeris caveat authoribus, qui fervido vividæ abrepti imaginationis æstu, observando nundum habiles, præcipites in judicando, in præscribendis majoris momenti remediis audaces, dubitant nunquam, alta sapiunt, secretiora, quæ retigere non valent, naturæ mysteria ad arbitrium explicant, errantesque delirantis ingenii fœtus, figmentum pro veritate cò periculosius emittunt in lucem,



quod summâ quâ non raro valent, loquendi profluentiâ; elegantîâ stili, suadendi arte, lectores trahere in errorem, & quâdam veluti labe contagii consueverint afflare.

Hos peiores angue fugiat procul scriptores, qui solius novitatis amore ducti, & nescientes habere modum, quidquid antiquitûs scriptum dedignantur, iter affectant inauditum, naturamque positis à semetipsis legibus obtemperare tandem gloriantur. Medicinam contrahunt, fateor; ingenioso sistemate totius corporis Mechanismum evolvunt; robur solidorum, fluidorum vires, ad punctum computant; morbos quoslibet ab unico (quem fingunt) fonte oriri & manare asserunt audacter, verbisque congruentibus factis, nova & eadem semper quolibet in casu, sapientiori certè incognita antiquitati præscribunt remedia. Hos pestem publicam salutis populorum eo infensiolem credat, quod artem Medicam cuilibet vel rudi, obviam & facilem repræsentent, ignorantia & temeritati ansam præbeant, immedicabile malum, Tironesque solâ horumce librorum lectione se Medicos esse arbitrati, invisere ægros non dubitent, per mortes innumeras, naturam non ludi impunè vix edocendi,

Sit

Sit Philiatro edificendæ Medicinæ dux, Judex & Arbiter divinus senex. Quis genus morborum & causas, signa & eventus, occasionem ubique fugitivam, tam præcipitem in acutis, certiorēque mendendi methodum, cognovit peritiùs, sapientiùs retulit unquam. Parentis Medicinæ mentem interpretetur Galenus, Philiatrumque semper comitetur versatus in singulis, concisus, & elegans Romanus Hippocrates Celsus. Sed quid vos, AUDITORES, tædiosæ enumerationis importunâ satietate defatigari vellem? Quidve, Philiatrī, extraneas, ut ita loquar, ampliùs vos mutuari suaderem opes? Manent jam à longo, æternùmque manebunt, aurea Scholæ Parisiensis scripta Medicorum, qui pretiosioribus antiquorum inventis, quidquid detexit ætas recentior, in Physicâ lucidius, subtilius in Anatomîâ, in Botanice selectius, expeditius in Chirurgiâ, in Pharmaciâ tutius, in praxi tandèm rationi & experientiæ consentaneum magis, additum ita consociaverunt, nova veteribus amico & salutari conjungentes vinculo, ut certissimâ nunc exurgente Medicinâ, his ducibus errare non paveat Philiatr, eorumque scripta diurnâ nocturnâque versans manu, se tandèm Medicum profiteri possit.

Tale est Medicinæ studium, AUDITORES. Tabulam nec vividioribus, nec mentitis adornavi coloribus; dixi vera: quâ solâ datur adire Medicinam, horrentem spinis monstravi viam; sic tota est Medica tellus se profiteri Medicum volenti, firmo prius calcanda pede. Qui expositis modo cognitionibus orbatus, ægros adire non horret, sordidis annumeretur circulatoribus, violatum non funestet Medici nomen; utque lege sapientissimâ cautum est, ne quis merces inducat peregrinas, quibus aliqua pestilentia suspicio inhereat; quidni & lege caveatur pariter, ne in societatem admittantur Medicastri & circulatores, qui contagiosâ labe urbes infestant & domos, peste ipsissimâ ipsi pestilentiores?

Absit ut tale quid à vobis pertimescendum suspicari velim, PHILIATRI CARISSIMI. Sola vos, confido, movebit publica salus. Paratos, docilesque monitis, assuetos à primâ juventute, non vincet labor, non terrebunt difficultates; monstratam viriliter & alacres sequemini viam, elucescetque tandèm illa dies, quâ vobis jure Medicis, tuto credetur hominum vita. Dulcis jam sanè vobis est & gratissima hujusce temporis imago. Conspersum rosis Medici fingitis iter. Honores, hominum fidem, laudes, supre-

numque in vivendi normam arbitrium, debitam sudorum, studii, laboris & vigiliarum, mercedem creditis futura. O juvenes inexpertri! Quis error vester? Quàm graviter allucinamini? Sic nescitis homines? Certus est labor, merces commentitia. Aperiat oculos, auribus attendite. Nihil eorum celabo; quorum inscitia vos quondam fortasse suscepti muneris pœniteret intempestivè, & quid scire debeant Philiatrî, ut Medicos se profiteri possint, exposito primùm, mixta Medici laboribus fastidia, quod secundum, attingam paucissimis.

## S E C U N D A P A R S.

**Q**UEM ergà liberos finxit Natura Patrem, AUDITORES ORNATISSIMI, hunc in Philiatros se præbere Medicum Professorem decet, adhortaturque publica salus. Quemadmodum ergò providus parens, institutæ liberaliter, sed inexpertæ proli, non tam suscipiendæ dignitatis munus edocet & officium, quam sustinendum per vitam monstrat onus; scopulos nuntiat, pericula monet, sic pro meo, PHILIATRI CARISSIMI, ergà vos amore, fore nunc piaculum crederem, si quod ducit ad Medicinam indigitato duntaxat itinere, quæ vos ab impru-

denti forsitan deterrebunt proposito, mixta laboribus Medici fastidia adumbrare non tentarem.

Si accepti beneficii magnitudine, hisce temporibus, ut olim, gratias metiretur humanum genus, & in firmâ valetudine præstantissimum illud cogitarent versari bonum, quo perduto semel, figmentum felicitas, voluptas torquet gravis, ridens offendit fortuna, & perenne cumulat irritamentum supplicii opum inutile pondus, quodnam benevolentiae monimentum & pignus, non expectaret vir ille Hippocratis probus, peritus medendi, qui sanitati civium invigilat semper irrequietus, seque, sua, & vitam consecrat, devovet & effundit: tunc vobiscum fateor, PHILIATRI CARISSIMI, dignus omni laude prædicaretur Medicus, ipsi crederetur soli, & supremâ in vivendi normam frueretur potestate; sed quantum ab antiquioribus sæculis mutata sit ætas nostra, collata simul doceant vos hodiè, hinc inspecta Medici vita, illinc monitorum, laborisque Medici fructus, & mixta ubique constabunt laboribus fastidia.

Quænam sit ergo, quæritis, AUDITORES, Medici vita? Hunc oculis subjiciam virum, qui suæ semper immemor & prodigus vitæ, orto vix sole, totâ silente sæpius naturâ, opem flagitantibus miseris præ-

sens advenit solatium & levamen. Concutiat domos debacchatus Aquilo; se solvant in imbrem Nubes; brumale rigeat frigore glaciali Cœlum; torridus æstuet Aër; horrorem incutiant naturæ crepitanti mixta grandini fulmina; periclitantur cives: devotus Patriæ, impavidus accurrit, advolat, & solâ ægrotantium commovetur, dum instat occasio præceps, sublevandâ sorte. Conscendit totâ die domos, quas dolor occupat, habitat timor: jacentis ægri conturbatur periculo, ad præterita obstupefcit, formidat præsentia, futura gemit. Mœrore contristatur amicorum, lacrimantibus condolet natis, iteratis fremit uxoris desperatæ clamoribus. Sudore madens, regressus domum, impatienti expectantium turbâ obsidetur anhelans; non lætè degustat cibos, non tranquillè, cursim edit: optatos sollicitæ conjugis vix accipit amplexus; circumstantibus certatim liberis subridere non vacat; quam unam aut alteram, familiæ, quieti, amicis horam concederet, quasi furtum sibi exprobrat publicum, & properans semper revertitur ad ægros. Cum labore fractus, membra vespere somno breviori reficere tentat, ingeminaris expectectus subitò pulsata vividius januæ ictibus, assurgit clamanti: Veni, propera, luctatur cum mor-



te devictus jam civis : Te solum dicit liberatorem , obtestatur , implorat : Factus es victima populorum ; cuncta tuum est subire pericula. Nusquàm ab opere cessat ; quem vidistis hodiè , cras , & per vitæ cursum , quem citiùs forsitan epotum de pleno gurgite , morborum metet virus , desudantem semper aspicietis. Quis vivit mortalis miserior ? Hunc non festus recreat Dies ; annua non novit communis lætitiæ solemnia. Totâ exultante naturâ , solus ipse nihil nisi triste videt , audit , cogitat , meditatur , & offendit. Et utinam , AUDITORES , hisce limitibus laboriosa circumscriberetur Medici vita ! Lætus & ovans sese publicæ devoveret saluti ; sed , quod æternum silere vellem , fastidiumque cumulat , ab ingratis hominum mentibus fides avolavit & pudor. Quem sola suscitât virum probum charitas , amor proximi , egeni ut divitis accendit , servire lucro , turpiter avaritiæ famulari , susurrare non horret calumniatrix , cui nihil sacrum , plebs , nec sola.

En laboriosa Medici vita , PHILIATRI CARISSIMI in laudibus , obsequio , & docilitate , expectatos tandiù jam quæramus laboris fructus. Ut nihil apud homines morbo frequentius , sic de Medicinâ & Medicis assuetus sermo. Superstitiosæ muliercularum



genti, animisque imbecillioribus illudendis inventum fuisse vanum & futilem artis Medicæ apparatus, quis non clamat? Ulline parcitur Medico peritiori? Qui quantum in morbis prodesse possit Medico fides, non ignarus, sese, vultum, & verba, captandæ ægrorum astantiumque benevolentia componit Medicus; dulcibus potentis eloquii illecebris solatur ægrum, meliora suadet, audit attentius astantes, officiosè dubia resolvit, dictaque & jussu, quantum patitur jacentis tuta salus, votis singulorum accommodat; hic ignorantiam & temeritatem, suavitate verborum mellitâ obtegere incusatur, loquacitate suâ, ut novum morbi genus, ab ægro sanæ adhuc mentis pertimescendus. Si fronte paululum austeriori, simplici armatus peritiâ, non compositus, ita ad ægros accedat Medicus, ut divini Juris & humani acerrimus Vindex, imminens periculum, mortem ipsam, ægrum non celet, preciosissimum tempus, inopibus rerum sermonibus perdere recuset, paucissimis respondeat, & interroget, insulasque & fuitiles astantium fileat ineptias; ille à societate publicâ lubenter arceretur, durus, crudelis & ferox; desperatio venit undè solatium quærebatur: Is mortem vaticinatur & infert à quo salus expectanda.

Nullus est tandem Medicus qui stupidâ vulgi non abutatur credulitate, callidus infidiator, privatæ utilitati & commodis fallacem & excultum non apponat sermonem, laudibusque consonat docilitas & obsequium.

Non minus in conservandâ sanitate doctus, quàm peritus in restituendâ, moneat quotidie Medicus, hominem hominis adesse infensissimum hostem; integro & feliciori donatum temperamento, insulibus fatalis morbi, incautum forsitan esse brevi lacessendum; invitum in morbo, quid valeat firma valetudo, recognoscere serius, perditam semel nonnunquam fugere irrevocabilem; quâ arte senescet sanus & fortis discendum à primâ juventute; viribus, ætati, loco, tempestatibus consulendum; in temperantiâ, sobrietate, continentiâ, exercitatione, aurê mediocritate, tutissimum versari sanitatis punctum; in otio, torpore, libidine effrænâtâ, ingurgitatione ciborum, condimentis, igneisque liquoribus exitium & pestem latere; irridetur Medicus, insanit, delirat, miserè vivens, vivere miserior docet, & quasi monitis asperius factum mortale genus, in vetitum nefas irruit impetuosiùs. In Meridiem molli-  
ter recubat juvenis; otio & fœcidiæ per diem tradit

dit corpus ; moventem se nunquàm aspicietis , nisi immoderatâ , turpi & illicitâ , quasi furens , rapiatur voluptate : ad satietatem prandet & cœnat , potat ad nauseam , nullum est condimentum acrius , non ardentior potus. Nec prudentiùs vivit vir ætatis maturæ , solis à juvene viribus discrepat. Inutile pondus senex saturatur & dormit.

An ergò ad arbitrium Medici regetur sanus , reponet forsitàn aliquis ? Quid cum Medico benevalens ? Suum in ægrotantes exerceat imperium Medicus ? Medicos non advocant in concilium sani & benevalentes. Quid ad Medicum sanorum vivendi norma ? AUDITOR SPECTATISSIME , teipsum testem appello. Dic , obtestor : cùm homines vegeti tibi , absit dicam vivendi ratione , sed sanguine vel amicitia carissimi , præcepta Medicorum illudentes , descriptumque modò sequuti iter , truculento quasi ictu fulminis perculsi morbo , è vivis , florente juventâ , citò rapti sunt inscii ; Culpastine immedicabiles sæpiùs inconsultæ sanitatis errores , sub pondere ferculorum fatiscentes mensas , condimenta ciborum venenis non inferiora , læthales vini meracioris illecebras , satiatas libidines , edaces furtivæ veneris fructus , longiorem somnum , tabescentes vi-

gillas, defidis otia vitæ? Ignotam injustè inculcasti causam morbi & fomitem, impotentiam remediorum, audaciorem medentis inscitiam; tuis ipsissimè utar verbis; ægrotantes fuisse à Medico jugulatos, publicè, non privatim, affirmare non dubitasti. O tempora! O mores! indociles delirant populi, Medici plectuntur insontes.

Sed quid à sanis & benevalentibus docilitatem & obsequium sibi polliceretur Medicus? Apud ægros, quorum est expectatio, spes, & votum, nonne saturatur fastidio? Quis in orbe tam ignarus ut nesciat, obstandum principiis, ab initio pendere finem: Quam norit artem, in hac solâ se exercere teneri quemlibet: Ignotum cæcos non vocari monstraturos iter: Perito duntaxat habendam fidem: Illudere ægrotanti qui fallit Medicum: Insontem calumniari, animi vilioris esse crimen odiosum; judicem hunc tandem esse reprobandum, qui de ignotis, ut surdus de sono, judicare non horrescit? Quis inconcussa hæc, vel imbecillior negaret principia? Violari ergò in solum Medicum, simplicissimas rationis & justitiæ leges, doceat vos, AUDITORES, acerba apud ægros, fors Medici & conditio. Non uno eodemque die laceffunt & terminantur graviores morbi, & si

qui sint, ut læthales semper, sic omnem respuunt Medicinam, frustra quæritur Medicus. Periculosè jamjam tentandus homo aggravatur primùm: Quid sentiat nescius, se sanum non esse agnoscit solummodò, fractusque membra componitur lecto: Brevis furit morbus, crudelioribusque stipatus symptomatis, & per temporis spatium perseverans, utinam! mitescat, & ad optatum sensum sine sensu perveniat exitum.

Quid agatur interim, fideliter referam. In insultu primo, quis futurus sit morbus, expectandum pronuntiant æger, astantes, & familia. An cunctatione & morâ avolet occasio præceps, morbus ex levi evadat gravis, læthalis ex graviore, solliciti parum nec docti, quas autumant perditas, igniferâ potione revocant vires, remque totam naturæ committunt otiosi spectatores. Ruere in pejus ægrotantem conscii, hinc & inde, ad omne circulatorum genus, (& quis non est circulator?) fidentissimè confugiunt auxilium petitori, & à solo cavetur Medico, qui ipso sanè periculosior morbo, extracto omni sanguine, aqueis liquoribus, diætâque exitiali prosterneret ægrotantem; cumque perfas atque nefas, ignarorum quibus jocus est & ludus hominum vita,

natura succubuerit remediis non dicam , venenis rectius , morsque ostium pulsat , audacior ex turbâ , uxorem vel familiam monet amicè , gravem morbum , soli esse perito & sapienti committendum Medico ; recedit quisque prudens , & tunc accersitur Medicus , qui auspiciis inceptum tam felicibus , suis recipit opus periculis , & proximæ solus culpabitur mortis.

Tempestivè jam vocatum fuisse suppono Medicum. Antecessam filebo vitam. Forsitan sapienter vixit sanus , qui æger soli confidit Medico : horret agirtas ; optimo donatur corporis habitu ; ægrotat periculose ; læthalem à se non contendam morbum. Nonne plerumque , inscio Medente , in ægrotantis exitium , opprobriumque Medici , victa ab astantibus fallitur ars doctior , certior observatio , experientia longior ? Præscriptis à Medico nonne reluctantur omnes & obsistunt familia , amici , ipsa custos ? Absente Medico , facienda protinùs morantur imbecillorum argumenta , loquacitas malè timida mulierum : dubitatur , procrastinant , fugit temporis momentum , crescit inflammatio , prætermittitur jussuum pars non inferior , ministratam fuisse impudenter affirmatur , conceduntur vetita , obstupescens Medicus , naturam



non recognoscit, perit æger, & ad eadem clamant ipsi homicidæ, Filius, Pater, Uxor, Maritus, cæcique in Medicinâ populus & magnates.

Quid sit Medicina, vos jam non latet, PHILIATRI CARISSIMI; comparandas monstravi cognitiones, fastidia non celavi. Insudandum est per vitam, misere vivendum. Dignus omni laude calumniis laceratur Medicus: viliori creditur agirtæ; Medico nulla fides: ubique expletur fastidio Medicus. Probate nunc vos metipfos; fortassè quondam suscepti muneris pœniteret intempestivè. Si propositi tenaces, non terreat labor, salus publica fastidiis præponderet; dulcissimus, fatebor quod res est, vos expectat voluptatis sensus, solatium manet inenarrabile. Ille maximum relligionis adimplevit punctum, summumque honoris & gloriæ assequutus est apicem, qui condonans inimicis, invitis ipsismet opitulatur & succurrit ingratis. DIXI.



---

*Approbatio Facultatis Medicinæ Parisiensis.*

**N**Os infra scripti, Orationem die vigesimâ-nonâ Novembris præsentis anni, in Scholis Medicorum, à Collegâ Clarissimo Magistro FRANCISCO MERY, publicè habitam, Facultatis jussu, legimus eâ quâ potuimus diligentîâ. Illam ab Audientibus jucundissimè exceptam, non minore voluptate à Lecturis excipiendam esse speramus. DATUM Parisiis die Decembris decimâ-quintâ, anno verò 1744.

MILLET, BOUVART, D. M. T. BARON, Filius.

---

**V**Isâ Approbatione Clarissimorum Virorum, qui examinandæ Orationi, à Clarissimo Collegâ nostro M. FRANCISCO MERY, die vigesimâ-nonâ Novembris præsentis anni in Scholis Medicorum habitæ, præpositi fuere decreto lato die nonâ Decembris, Facultatis Saluberrimæ Parisiensis nomine, per me licet Typis mandetur, die decimâ-quintâ Decembris, anno 1744-

G. J. DE L'EPINE,

Fac. Med. Par. Decanus.